

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

RAMADAN MUBARAK!

08 Juin 2018

(23 Ramadhan 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « Le Lailatul Qadr & L'Importance Zakaat ».

Dans Quran Shareef Allah (swt) dire:

بِسْمِ اللَّهِ الرَّحْمَنِ الرَّحِيمِ ○ إِنَّا أَنْزَلْنَاهُ فِي لَيْلَةِ الْقَدْرِ ○ وَمَا أَدْرَاكَ مَا لَيْلَةُ الْقَدْرِ ○ لَيْلَةُ الْقَدْرِ ○
خَيْرٌ مِنْ أَلْفِ شَهْرٍ ○ تَنْزِيلُ الْمَلَائِكَةِ وَالرُّوحِ فِيهَا بِإِذْنِ رَبِّهِمْ مِنْ كُلِّ أَمْرٍ ○ سَلَامٌ هِيَ حَتَّى مَطْلَعِ
الْفَجْرِ ○

Bismillaahir-Rahmaanir-Rahiim; 'Innaaa 'anzalnaahu fii lay-latil-Qadr: Wa maaa 'adraakamaa Laylatul-Qadr? Laylatul-Qadri khayrum-min 'alfi shahr. Tanazzalul-malaaa 'ikatu war-Ruuhu fiihaa bi-'izni-Rabbihim-min kulli 'amr: Salaamun Hiya hattaa matla-'il-Fajr.

Au nom d'Allah, le Très Gracieux, le Très Miséricordieux. Vraiment, Nous fine fer (le Quran) déssane pendant la Nuit du Destin. Et ki pou faire toi conner ki été sa la Nuit du Destin ? La Nuit du Destin li meilleure ki mille mois. Bane anges et l'Esprit déssane pendant sa la nuit là, par permission zot Maître, avec tout bane l'ordre. C'est la paix, ziska ki soleil levé. (Al-Qadr 97: 1-6)

Quand mois Ramadhan commencer, bane musulmans faire *Ibaadat* avec beaucoup l'enthousiasme pour faire plaisir Allah. *Ibaadat* pendant sa mois là li inclure bane actes *Faraz* (obligatoire) aussi bien ki beaucoup *Nafil* (bane actes d'adorations volontaires/ supplémentaires), et ou trouve bane *Masjeeds* rempli avec dimounes, *Alhamdulillah*. Mais *Insha-Allah*, li essentiel ki sa état des choses là bizin reste pareil même après le mois de Ramadhan aussi. Dans sa mois béni là, tendance pour aide bane pauvres et nécessiteux li aussi grand et très important.

LAILATUL-QADR

Pendant sa mois là, nous gagne la nuit *Lailatul Qadr* aussi appelé, *Shabé Qadr* (La Nuit du Pouvoir). D'après bane Hadiths de nous bien-aimé prophète Hazrat Muhammad (saws), récompenses *Ibaadat* pendant sa la nuit là li égale à *Ibaadat* plus ki 1000 mois et si nous calcule sa bien et nous pas faire erreur dans nous mathématique, li faire 83 ans et 4 mois. Prenant en considération durée la vie humaine zordi, li pour impossible pour ene dimoune faire sa quantité *Ibaadat* là dans so la vie même si li faire li jour et nuit.

Ena ene histoire derrière sa la nuite là. Ene dimoune, Samsoun (ra) depuis bane Bani Israël ti ene dimoune ki ti faire beaucoup *Ibaadat*. Li ti la guerre avec bane infidèles et zot ti peur li beaucoup. Allah (swt) ti donne li bane tel la force ki même ene l'armée infidèle pas ti pé capave batte li, ou même blesse li. Donc, dans la vie de Samsoun (ra) ena ene histoire ki très intéressant, pour so la foi (*Imaan*) lors Allah, so courage et la force ki li ti ena. Li ti reste toujours prêt pour faire le *Jihaad* pendant mille mois. Quand Hazrat Muhammad (saws) ti entende sa récit concernant sa dimoune extraordinaire de bane Bani Israel là de Hazrat Jibreel (as), li fine pense so *Ummah*. Li fine penser ki la vie courte et ki nous pas pou gagne l'occasion pou gagne même intensité de bane bénédictions ki Samsoun (ra) ti recevoir pou so bane dévotions et fidélité pou 1000 mois.

Allah (swt) fine accepter le désire de So *Rassool* et fine accorde li et so *Ummah* ene très grand faveur; ene tel faveur ki bane les autres *Ummat* pas fine recevoir;

ene tel faveur avec ene prescription extraordinaire, c'est-à-dire, le *Lailatul Qadr*, la Nuit du Pouvoir. C'est dans sa la nuit là même ki le Quran Shareef ti dessane, c'est-à-dire, bane révélations pures d'Allah lors So bien-aimé prophète Hazrat Muhammad (saws).

D'après bane traditions (*Sunnan*) nous bizin cherche sa la nuit là pendant bane la nuits impairs pendant les dix derniers jours de Ramadhan. C'est-à-dire, 21^{ème}, 23^{ème}, 25^{ème}, 27^{ème}, et 29^{ème} nuits. Signes de sa la nuit là c'est ki li ni trop frais ni trop chaud. Dans sa la nuit là bane croyants (*Mumineen*) ena ene sentiment immense de satisfaction.

C'est ene calcule ki mo faire. Attention, c'est pas ene révélation. Capave mo pé penser lor là et li pas exacte. Quand nous lire Surah Qadr, ena *Lailatul Qadr* mentionner trois fois, dans premier, second et troisième versets après *Bismillah-ir-Rahman-ir-Rahim*. Dans langue Arabe, *Lailatul Qadr*, ou sois *Lailatul Qadri* li composer de neuf lettres. Sa neuf lettres là li vine trois fois (9x3) kot li faire ene totale de 27.

Plusieurs compagnons du Saint Prophète Hazrat Muhammad (saws) couma Hazrat Ibn Abbas et Ubbay bin Ka'b (ra) fine rapporté ki *Lailatul Qadr* c'est 27^{ème} la nuit et so signe c'est ki quand soleil lever le matin péna lustres/ rayons autour de li. (Muslim, Ahmad, Tirmidhi).

Hazrat Aisha (ra) dire ki li fine demande Rassoollullah (saws) quand *Lailatul Qadr* et ki *duah* pour lire si arriver li trouve sa la nuit là. Rassoollullah (saws) fine recommande li pou lire beaucoup **Allahumma innaka afuwwun tuhibbul afwa fa-fu 'anni** (O Allah! To Pardonneur et To content pardonner; alors pardonne moi). (Tirmidhi, Ibn Majah, Mishkaat).

Donc, concernant *Lailatul Qadr* dans le mois de Ramadhan plusieurs fois mo fine cause lors sa sujet là et puisse-ki le temps limité, li bon aussi pour mo cause quelques mots lors *Zakaat* ki aussi bien important.

ZAKAAT DANS L'ISLAM

Zakaat li ene pilier de l'islam et li ene acte de charité obligatoire ordonné à chaque musulman éligible. Li ene acte de dévotion et ene forme efficace pour atteindre la justice sociale. Li aussi ene des cinq piliers de l'islam et li prescrire

dans Quran Shareef et dans Hadiths. Racine, base du mot *Zakaat* en arabe signifier bénédiction, croissance, pureté ou amélioration. Mot *Zakaat* li réfère à la part déterminer dans richesse ki prescrire par Allah pour être distribuer parmi bane catégories décrir par Allah dans Surah At-Taubah (Chapitre 9, Verset 60) et Hadith. *Zakaat* li ene acte de culte ki purifier la richesse et l'âme de bane musulmans.

Purification richesse veut dire mobilisation bane du bien en vue de la croissance financière et distribution justifié. Purification l'âme veut dire libération le cœur du musulman de la haine, jalousie, égoïsme, et avarice.

Techniquement parlant, *Zakaat* li ene proportion fixe ki retiré lors ene base annuel de la richesse et bane bénéfiques à bane bénéficiaires pour le bien-être de la société musulmane. *Zakaat* li tiré lors la balance nette après ki ene musulman déduire so bane dépenses pour bane nécessités personnelles, familiales et autres. À la fin l'année si ene musulman trouve li en possession de 35 grammes l'or ou 595 grammes l'argent ou l'équivalence en espèces ou en article de commerce li bizin paye *Zakaat* lors là au taxe de 2.5%, applicable aussi à bane produits agricole et bétail.

Zakaat li mentionner environ ene trentaine de fois dans Quran Shareef et li mentionner plisse en association avec *Salaat* (la prière) comme: « **Bane ki accomplir Salaat et bane ki paye Zakaat.** » (Al-Baqara 2: 278).

Anas (ra) cite Rassoollullah (saws): « *Celui ki mort avec la foi sincère en Allah, en adorant Li tout seul sans associer personne dans So l'adoration, en accomplissant la prière et en payant Zakaat, li mort avec le plaisir d'Allah.* » (Ibn Majah).

Rassoollullah (saws) dire: « *Si Allah fine offert la richesse à quelqu'un mais ki li pas paye Zakaat, sa richesse là pour apparaite jour jugement dans forme ene gros serpent chauve et empoisonné avec deux taches là-haut so liziés ki pour encercler li et pour serre li avec force en disant: 'Mo même to richesse, to trésor (ki to fine accumuler)'.* » (Bukhari).

Rassoollullah (saws) fine aussi dire: « *Péna peuple ki pas paye Zakaat et ki épargner par Allah sans ki zot endure souffrance à travers désastre, la famine, et la sécheresse.* » (Tabarani, Hakeem, Baihaqi).

Zakaat li tellement important dans système islamique ki Hazrat Abu Bakr (ra) dire: « Par Allah mo pou combatte bane ki faire différence entre *Salaat* et *Zakaat*. *Zakaat* li ene droit lors richesse. Par Allah si zot refuse pour donne moi ene cabri ki zot ti habituer donne *Rassoollullah* (saws), mo pou combatte zot pour sa raison là.» (Nasaï).

Donc, bane ki refuse paye *Zakaat*, li égale à infidélité et renier la foi islamique. Ene musulman bizin paye *Zakaat* si li possédé et li ena pouvoir pour dispose ene du bien. Ainsi ene du bien perdu ou voler péna *Zakaat* car li pas légalement en possession du musulman.

Croissance ena relation directe avec expansion richesse. *Zakaat* li obligatoire lors du bien ki ena potentiel de croissance. Sa li comprend: l'argent en banque, bétail, plantation, marchandises, etc. Cependant péna *Zakaat* lors du bien réserver à usages personnel tel ki bane résidences habités, meubles, l'auto etc.

Li bien important ki nous bien vigilant quand nous tire *Zakaat* de tel façon ki nous pas oublier aucaine item. Vaut mieux faire paiement de *Zakaat* en surplus ki li en moïnse! *Insha-Allah*, *Zakaat* ki ou pou tirer pour ene source de nouvelle revenues pou ou dans ou la caze et li pou aide pou purifier ou et ou familles et tous ou bane du biens ki ou posséder, *Ameen*, *Summa Ameen*.

Mo souhaite pou tous mo bane disciples sincères, fidèles et ki ena la crainte d'Allah dans zot lécoeur et ki zot content Allah et Allah content zot, ki Allah déverse bane bénédictions de *Lailatul Qadr* lors zot (en plus de *Lailatul Qadr* ki zot fine gagner avec la venue d'ene Messenger d'Allah dans zot l'époque), et tous bane ki ena kit manquements dans zot la foi, mo souhaite zot aussi ki Allah déverse bane bénédictions de *Lailatul Qadr* lors zot afin ki sa vine ene source de lumière pou zot pou fer zot sorti de l'état d'incertitudes et de paresse dans la religion pou vine bane l'âmes éclairées ki pou solides pou deboute pou amène le monde vers Allah demain. *Insha-Allah*, *Ameen*.